

**Pendekatan Sedia Ada Tidak Perlu Diubah Untuk Tingkat Kesedaran Hak Kepenggunaan
Bernama
09 Mei, 2012**

KUALA LUMPUR, 9 Mei (Bernama) -- Pendekatan sedia ada yang dilakukan kerajaan seperti siri jelajah dan kempen kesedaran bagi meningkatkan tahap kesedaran di kalangan rakyat Malaysia terhadap hak kepenggunaan masih relevan dan tidak perlu diubah.

Timbalan Menteri Perdagangan Dalam Negeri, Koperasi dan Kepenggunaan (KPDNKK) Datuk Rohani Abdul Karim berkata kempen yang dijalankan setakat ini menunjukkan peningkatan memberangsangkan, dan berpandukan peningkatan itu, tidak ada sebab mengapa perubahan daripada segi pendekatan perlu dilakukan.

Beliau berkata tahap kesedaran rendah di kalangan pengguna Malaysia terhadap hak kepenggunaan seperti yang ditunjukkan dalam satu kajian oleh KPDNKK baru-baru ini merupakan suatu fenomena global dan tidak berlaku hanya di Malaysia.

"Di mana-mana negara seantero dunia, tahap kesedaran dalam kalangan rakyat terhadap hak kepenggunaan tidak semestinya 100 peratus, tetapi sekurang-kurangnya kesedaran asas itu ada.

"Apapun, segala maklum balas yang diterima oleh kami melalui siri jelajah dan kempen akan dijadikan sebagai pengukur untuk melaksanakan program-program yang lebih relevan, termasuk program sedia ada di masa hadapan," katanya ketika ditemu bual dalam program 'Dalam Radar' terbitan Bernama Radio24, Selasa.

Rohani berkata demikian ketika mengulas kajian yang dijalankan KPDNKK yang mendapati tahap kesedaran di kalangan rakyat Malaysia terhadap hak kepenggunaan masih rendah.

-- BERNAMA

Hak Cipta Terpelihara © 2012 BERNAMA

Source: <http://www.bernama.com/bernama/v6/bm/newsindex.php?id=664924>